

SAN PABLO KARTA NYAFXTE FXI'JNI TIMOTEO JII

Pablo Timoteo's fxi'jni

1 ¹Adxa' Jesukristo jxkaahnisa Pablo yaaseth, txāasa kwe'sxtxi nwe'wesa Dxus vxite' kwe'sxtxi jxpe'jsa Jesukristo txāawe'sx kaahnisath, Jesukristo yuuxāa nwe'wewa'ja's pta'sxsa. ²Dxus yakh jxpubamée fxi'zesa isa adx nçxi'k na'wesa Timoteo's fxi'jaçthu naa karta's. Dxus kwe'sx Tata vxite' kwe'sxtxi jxpe'jsa Kristo Jesus txāawe'sx peeygähçxa pu'çxte', idxa' ewçxāa wēt fxi'zene'ga.

Kaapiya'jni ewmeesa's jxpa'yakxkahn neewe'weni

³Macedonia kiwen u'jweççxa', idxa's Efxeso çxhabtee nvxihtthu Dxus yuwemée txāawe'sx ūus yajkxçxa fxiy kaapiya'jsatx yupkahn. ⁴Txā'wēme', txāawe'sxa' Dxus librute yu' fxi'jnimeetewa nyafxiitey yaçgawe'sxa' txā'wēt x yūu jīna yajkxçxatx kwentu'ju', aça' txā'wēsath wēse'khamén idxa' we'wewa'jsag neeyūu. Aça' txā'wēsaçxá's kwentu'jni' Dxus neewe'weçxa nvxihtku txāate yu' le'çxkweçxāa yuhwa selpi'çme'.

⁵Txāa pa'gath na'wē yūuwa'jçxá's jxkaaja': puutx ya'peeygāawa'ja's isa īsxiimée ūusuh jxuka yajkxna Dxus yakh yuuxāa fxi'zewa'ja'sthu neewe'we'. ⁶Maafi yu' txā'wē peeygāawa'ju txuteeçxa kwentu selpiwa'jmeesuçxáatx puutx we'wena fxi'ze'. ⁷Txāawe'sxa' Dxus libru's jiyuwa'ja's kaapiya'jsatx yuu wēje', nawa txāawe'sxiçxāa yuhwa jiyu'çmeeta' peekx kaapiya'jni's txakwe wala çxhāçxha we'weççxawa.

⁸Jiitha'w Dxus jxkaahni leya' ew yuja', ma'wē jxkaathe' kxtey yuusāa yakh yu'. ⁹Ew yūuna fxi'zesatxi' Dxus jxkaahni leya' thegwal' j'phme'. Dxus jxkaahni leya' na'wēsaçxáatx thegwal' j'pha': Dxusna açesa, Dxusna nwēese'jsamée, ewmeesa, pkalsawe'sx, Dxusna ūukhsamée, Dxus yuwe'swa weeçxsa, neywe'sxtxi ikhsa meeçxawa nasa ma'wēsathwa ikhsa, ¹⁰ptamumey pkal yūuna fxi'zesa meeçxawa piçthē'j pwe'sx txā'wē

yūsáa, nasatx sũthçxa ikhsa, ãsxiisa, Dxus uyte isath we'we' jĩna ãsxiisa. Sa' Dxus yuwemeesuçxáa txã'wẽ puutx we'wena fxi'zeni yu'sa' Dxus leya' yup yuju'k. ¹¹Aça' adx kaapiya'ja'th txã' ãsxiinisame', txãasaíi Kristo yuwe ewte nvxiitwa'jsa's Dxusíi adxna neewe'weçxa nvxihtku txãafiçxá'.

Dxus peeygãhçxa txakwe ew yũupa'ga weçxani

¹²Kwe'sxtxi jxpe'jsa Jesukristo's weçxa'th, adxa's txhitççxa na'wẽ selpiwa'jsak nvxiht txajx tasxte selpiwa'jsane'tka yu' naa pa'ga. ¹³Adxa' nyafxíi yu' ahççxa wéesxuuna pkxuuya' pakwesaath yu'. Nawa Dxusa' adxa's peeygãhçxa jxpa'gak, jiimeeçxane'tka txã'wẽ yũuna ũsu' naa pa'ga. ¹⁴Txãasa kwe'sxtxi jxpe'jsa pu'çxni' adx yakha' iiméh walasa yu'k vxite' Kristo Jesus yakh utxaapa'ga txajx peeygãanisawa txã'wẽyku walasa yu'.

¹⁵Kristo Jesus naa kiwete kĩjk pkalsatx nwe'weya' jĩna pta'sxni' ãsxiinisame', aça' txã'wẽ pta'sxni's nasa jxukaysa isa yuhna sũhwa'j ji'phta'. Nawa maatewa jxthaakwe pkalsa' adxthu yu'. ¹⁶Makwe txã'wẽtewa, Dxusa' adxa's peeygãjk, adx txakwe ewmeesatewa Jesukristo' txã'wẽsa's khuẽ'yku wejx peeygãhna jxpa'ga sũjkahnku txã'wẽ yũu. Aça' maawa adx na'wẽy ewmeesa ũsçxawa kwe'sxwa pçumée itxi fxi'zewa'ja's pejka jxpa'gayuju'nja'w sũjkahnku txã'wẽ yũu. ¹⁷Txãa pa'ga bagaçxtewa weçxana nes yuuwa'j ji'ptha'w jxkaahsa pçuwa'jsame's. Txã' kwe'sx yafxte vxyaasame', nawa bagaçxte yuhwa pçuwa'jsawame'. Dxus txãa yuuçxáa kíhte yuhwa sxii'gwa'jsame'.

¹⁸Adx nçxi'k na'wẽsa Timoteo idxa's neewe'weçthu, iidx ũuste ma'wẽ ew fxi'zewa'ja's ũusuthena txã'sçxáa kxtey yuuna, ew yũuwa'jçxá's pa'pçxuna Dxusa' pu'çxhina sũhna fxi'zekahn. Idx txã'wẽ ew fxi'zekahníçxáatx yakhthẽ'jwe'sxwa dxiikhẽy pta'sx Dxus yakh jxpubamée selpiwa'jsa' jĩna aça' txã'sa' kxtey myuu. ¹⁹Maafí yu' kíh txã'wẽ ewsatewa jiiçxa, kí' kíh ewmeesatewa jiiçxawa nwéese'jmeeçxa, Dxus yakh fxi'zenijũ jxpubatx. ²⁰Txã'wẽ yũusa' Himeneo, Alejandro txãawe'sxta'. Aça' adxa' txãawe'sxtxi' eçxthẽ'j kusete nvxihtthu, kxah Dxusa's açewe'weya'mée piyaatxna.

Dxus yakh ma'wẽ puutx we'wewa'ja'swa kaapiya'jni

2 ¹Nyafxte' Dxus yakh puutx we'wewa'ja's khuẽ'ythu neewe'we'. I'kwe'sxa' nasa jxukaysa pa'gate Dxusa's weçxana mneewe'wewe txãa yakh puutx we'wena, sa' kíh pẽjçxawa pẽywa'ja'. ²Txã'wẽy naa kiwete jxkaahna ũssawe'sx jxukaysa pa'gatewa Dxus yakh puutx we'wewa'ja', kxah Dxus pu'çxte' txãawe'sx ew jxkaathe', wõt fxi'zeya' aja'nja'w kíhwa kuçx yuunimée Dxus yakh yuuçxáa. ³Kwe'sxtxi nwe'wesa Dxusa' txã'wẽ yũuni'sku jxthãasu'. ⁴Txãa pa'gatey Dxusa' kim yuhtxwa vxitu jxthãasu'çme', jxukaysa ewsa's jiyuçxa ewte neeyũuni'sku jxthãasu'.

⁵Txã'wẽme!, ewte nvxiitwa'jsa! teeçx Dxus yuuçxáa üsa!, açã' txã'wẽy Dxus dxi'pte nasaa ju'gu yuuçxa we'we pu'çxsawa teeçx íiçxáa üsa!, txã' Jesukristo! kwe'sx kakwe's íiçxáa ji'phsa. ⁶Txãa Jesukristok jxukaysa ewte neeyüwa'ja's vxitna pkalsa pa'gate uu txã'wẽ yüwa'j en ähte!. ⁷Aça' txã'wẽ yüuni's pta'sxwa'jsa txhitxçxa nvxiitnisath, Jesukristo jxkaahnisa. Txãasa adxa' ísxiinimeesa isasa's kaapiya'jwa'jsath, judiu ji'jmée vxite nasawa Dxus yakh jxpubamée fxi'zekahn. Txã'wẽ kaahnisath jĩçxa' ísxiija'çmeeth txã'sa' Kristo' jiia'.

⁸Txãasath neewe'we!: Nasa msuuwe'sxwa Dxus yakh puutx we'wewa'j ji'phta' puina fxi'zemée Dxus yuuçxáana üsuh jxuka yajkxna. ⁹Txã'wẽy u'ywe'sxwa ropa iijxüni's jxpa'yakxwa'ja' nasa we'wekahmen. Sa' dxkhasa's kiduççxa' txakwe wala vxyuu beh ki'pna ew pheu'jmeetewa ewna.

¹⁰Athnisawa jwee pa'gasa iijxümeççawa, Dxus yakh ew fxi'zeniçxáa wejx ewsa!, txãa yakhçxáa fxi'zesayã'ja'. ¹¹U'ywe'sxa' wala jxpa'yakx wese'jna u'pwa'jsata' kaapiya'jni's. ¹²Nasaa ksxavxyte u'y we'wewa'ja's üsme'nja, sa' piçthẽ'ja's jxkaahwa'ja'swa üsme'nja, wejxwa sxuuna'çxáa u'pwa'jsa'. ¹³Txã'wẽ piçthẽ'ja's jxkaakhamení, Dxusa' Adana's khuẽ'yku pheu'j, e'suk Ewa's pheu'j. ¹⁴Aça' Adan ya'ísxii ni yuume!, u'yku ya'ísxii. Txã'wẽ ya'ísxiiçxak pkalte wete. ¹⁵Nawa u'ya' peekx luuçtxxi ew jxpe'jna Dxus yakhwa jxpubamée ew fxi'zeçxa!, ewte neeyüuna.

Ma'wësa anciano yüuwa'ja'swa pta'sxni

3 ¹Isath we'we!: Maawa dxuus yatte jxkaahwa'ja's jxpa'gasa anciano' mjii ewsa's jxpa'gasa yuuna. ²Nawa kxtee jxkaahwa'ja's jxpa'gasa' kíhte yuhwa jxpubamée wala ew fxi'zesa yuuwa'ja', ähmée yüute yu'kxpehni fxi'zewa'jsame!. Sa' peekx nyuu yakhçxáa fxi'zesa yuuwa'ja'; kíhtewa jxuka jxpa'yakx fxi'zesa yuuwa'ja', sa' zhiçxkwe juuna' yuumée fxi'zesa yuuwa'ja'; paadesatx yat pki'jna fxi'zesa yuuwa'ja', sa' ewsa's ma'wë kaapiya'jwa'ja'swa jxuka jiisa yuuwa'ja'. ³Tüuna fxi'zesa yuuwa'jme' puui jxpakwena, vxyu knaywa'jçxá's yajkxna fxi'zesa yuuwa'jme', wejxwa vxyu's yajkxmée peeygãhna pu'çxna ewçxáa yüuna fxi'zesa yuuwa'ja'. ⁴Peekx yattewe'sxtxi ew zhiçxkwe jxpe'jsa yuuwa'ja', sa' peekx luuçxwa nwëese'jna ew fxi'zekahn kaapiya'jsa yuuwa'ja'. ⁵Txã'wẽ peekx yattewe'sx yuhtxwa ew jxpe'jya' äjameeçça!, ¿ma'wë Dxus luuçx yuutxi' jxpe'jya' äjakx? ⁶Dxuus yatte jxkaahsa' Kristo's u'se jxpa'gasa yuuwa'jme!. Txã'wẽme!, wala iijweççx yajkççxa ewmeete weteena eçxthẽ'j weteniitey. ⁷Nasa Dxusa's jiimeesa ksxavxysuwa wala ew fxi'zesa yuuwa'ja', txã'wẽ eçxthẽ'j kusete weteya'mée, nasa ewmée we'wewe'sxte.

Ma'wësa diákono yüuwa'ja'swa pta'sxni

⁸Txã'wẽy dxuus yatte pkhaakhesatx theg pu'çxsa diakonowa Dxus dxi'pte wala ew fxi'zesa yuuwa'ja!. Kĩh yüuya' puutx we'weççawa

ĩsxiimée kxtey yuusáa yuuwa'ja'. Tūumée fxi'zesa yuuwa'ja', vxyuu knaywa'jçxá's wejx pa'pçxuna fxi'zesa yuuwa'jme'. ⁹Dxus yakh fxi'zewa'ja's ew jiisa yuuna sa' ũustewa jxpubamée ũsthu sũhwa'ja's ji'phusa yuuwa'ja'. ¹⁰Ma'wēsatawa jiyuya' nyafxte maz en nvxihtçxa, kihtewa ewçxáa fxi'zeni's uyçxa txā'wē dxuus yatte pkhaakhesatx theg pu'çxwa'jsa nvxiitwa'ja'. ¹¹Txā'wēy u'ywa dxuus yatte selpiina fxi'zesa' Dxus dxi'pte wala ew fxi'zesa yuuwa'ja', vxitesatx nuywe'wemée, kihtewa jxuka jxpa'yakx ewçxáa fxi'zesa yuuwa'ja'. ¹²Dxuus yatte pkhaakhesatx theg pu'çxsa diakono' peekx nyuu yakhçxáa fxi'zesa yuuwa'ja', sa' peekx yattewe'sxtxi ew jxpe'jsa yuuwa'ja'. ¹³Txā'wē diakonowe'sxa' txāawe'sx mji's ew mjiiçxa', tuhthetx fxi'ze', sa' Kristo Jesus yakh fxi'zewa'ja's thaamemée pta'sxwa'ja's uyu'tx.

Kwe'sx ewte neeyūuwa'ja's kim yuhnawa kaajiyu'jnimeek ũsu'

¹⁴Idx yakh puutx uyya' dud yuwe'nja sūju'th, nawa meeçxa' jxthēeyuuwá'nja sũhçxa naa karta's fxi'jaçthu, ¹⁵kxah Dxus yakh fxi'zesa yakh ew fxi'zeya' ma'wē yūuwa'ja'swa jiyune'ga. Txāawe'sxa' Dxus ítxisa luuçxta', txāasatx isa ewsa's nvxihtmée txāate yuuçxáa fxi'ze'. ¹⁶Kwe'sx ewte neeyūuwa'ja's kim yuhwa jiyunimeek ũsu' txā'sa' Dxusa' kaavxya'ja'kh txā' na'wē seena' walasa':

Dxusa' nasaa kakwe yakhku vxyaa,
 Sa' Dxus Espiritu we'weçxa': Txā' kīh pka' yuhwa ji'phmeesa' jīnik yuu.
 Aça' Dxus angeleswe'sxwa uyniisak yuu.
 Sa' mtee mteewa jxuka pta'sxni yuute',
 Naa kiwete msuuwe'sxwa maafí yu' txāawe'sx ũuste jxpa'gatx.
 Txajū' cielute ki' jxpa'ganik yuu.

Dxus tасxuh txuteeçxa ewmeesaçxá's kaapiya'jsa

4 ¹Txā'wē ew āate kaavxya'ja'jni yuutewa, maafí yu' nmeh en yuuçte' Dxus tasxu txuteetxna eçxthē'j ĩsxiina kaapiya'jnite fxi'zeya'. Txā'jīnak Dxus Espiritu' āate pta'sxi'. ²Txāa nasa ĩsxiina kaapiya'jsa' yuwejçxáa ew we'weçxa', ũuste yu' eçx jxkaahniçxá's nwēese'jna ewsa yu's nwēese'jsame' ³na'wē jxkaajatxna: Kabawa'jme' sa' ũ'tasxa's Dxus nvxihtku Dxus nwe'wenisa ewsaçxá's nwēese'jsawe'sx Dxusa's weçxana ũ'kahn txāa ũ'a's txhitçxaçxáa ũ'wa'ja' jītxna. ⁴Txā'wē yuukahmení Dxus nvxiitnisa yu' kīh ũ'wa jxuka ewsa', aça' ewmeesa' jīmée ũ'wa'ja', ⁵txāa pa'gatey Dxus yuwete we'weçxa': Ū'a' jxuka ewsa' jī'k aça' ũ'a's jxpa'gaçxa' Dxusa's weçxaçxa ũ'te', ewmeesa yu'çme'.

Jesukristo's wala ew selpisáa

⁶Txā'wē Dxus yakh fxi'zewa'ja's ũuste yu'akhçxa isasaçxá's kaapiya'jni's ew piyaçxa yakthē'jwe'sxtxi kaypuba'jmée jxpe'jçxa', Jesukristo's wala

ew selpisaaçxa txã'wê yuune'ga. ⁷Dxus yakh fxi'zewa'jmeeçxá's we'weni seelpimeesatxi' nwêese'jmée, Dxus yakh fxi'zewa'jçxá's çxhãçxha mpa'pçxu. ⁸Txã'wême! kakwe çxhãçxhawa'jçxá's pa'pçxute!, jwee yu' selpi'çme!. Nawa Dxus yakh fxi'zewa'ja's çxhãçxha pa'pçxunisak wejx jxthaakwe selpi!. Txã'wêsa! naa kiwete ew fxi'zewa'thek selpi!, sa' cielutewa selpiwa'jsaíçxá!. ⁹Na'wê pta'sxni' íxiiinísame!, açá' jxukaysa nwêese'jwa'j ji'phta!. ¹⁰Txãa pa'gáiçxáatha'w pxthaa ya'iiwêesxuunawa çxhãçxha mji!, txãa pa'gatey Dxus ítxisa úsa' txã' pu'çx yujuna súju'tha'w, txã' naa kiwete nasa jxukaysatx nwe'wesa' txã'sna úuste jxpa'gasa yuutxi' jxuka.

¹¹Txã'wê yúuwa'ja's ew kaapiya'jwa'j ji'phgu. ¹²Sa' piçtakxa' jına weeçxwe'sxte wala ew mfxi'ze, kxah Dxusa's jiiisawe'sx iidx fxi'zeni's uyçxa!, txã'wêy ew fxi'zekahn kíhtewa úus yajkçxha mwe'we. Sa' txãawe'sxtxi peeygáhna mfxi'ze, Dxus yakh jxpubamée, kíhte yuhwa pkalte wetemée. ¹³Adx pa'phkaçx idxa' Dxus yuwe's nasaa ksxavxyte léeyna, yu'kxpehna kaapiya'jna yuuwa'jçxá's pa'pçxuna mes. ¹⁴Idx kíhtewa sxiigmée ájawa'ja's Dxusa' úsku ancianowe'sx idxa's peekizeçxa Dxus yakh puutx we'wete txáatxi' ivxiituya'mée wala mpa'yajkx. ¹⁵Txã'wê ew fxi'zewa'ja's yuuçxáa peçxkanamée mfxi'ze, kxah idxa' Dxus yakh jweeíçxáa çxhãçxhana u'jni's jxukaysa uyuutxna. ¹⁶Peekí wala mpa'yajkx sa' kaapiya'jni'swa txã'wêy mpa'yajkx kíhte yuhwa sxiigmée. Txã'wê yúuçxa!, idxíwa ewte neeyúune'ga, sa' iidx pta'sxni's wêse'jsatxwa ewte nvxiitune'ga.

Dxus yakh fxi'zesatx na'wê yúuna fxi'zewa'ja'

5 ¹Idxa' thê'jsatxi's juuna' we'wena yu'kxpehmée, wejxwa peeygáhna ewçxáa myu'kxpeh, iidx tata na'wê yajkxna. Sa' piçtakxtxiwa iidx nyakhwe'sx na'wê yajkxna myu'kxpeh. ²U'y thê'jsatxwa iidx mama na'wê yajkxna ewkuêçxáa myu'kxpeh. Sa' kna'sawe'sxtxiwa iidx npe'sx na'wê yajkxna myu'kxpeh wala jxpa'yakx fxi'zena.

³Nmi' uute u'yçxáa neeyúusaawe'sx kíhwa ji'phmée pejiina ússatxi' mpu'çx. ⁴Nawa txãawe'sxa' nçxi'k meeçxa' nçun ji'phuwáatxna açá' txãa nçun meeçxawa nçxi'k txã'wê njí'ja's jxpe'jwa'j ji'phta!, neywe'sx ma'wêne'ta peeygáhna jxpe'j txã'wêy yúuwa'j ji'phta!. Txã'wêk Dxusa' jxtháasu!. ⁵Nawa nmi' uute! luuçx ji'phmée txãaçxáa neeyúusa!, Dxus yuuçxáanatx een isa neewe'wena fxi'ze!, Dxusa' pu'çxhina súhna. ⁶Nawa vxite! txã'wê yúumée nmi' uuyá'the' naa kiwetewe'sxçxá's yajkxna fxi'zesa' uuní na'wêsayá'tha!. ⁷Áçxha' nasa ekajuwe'sx ewmée nuywe'wekahmén, na'wê yúuwa'ja'swa mkaapiya'j u'yçxáa neeyúúsaa ji'ljtx: ⁸Txã'wê peekx nwe'sxtxi jxpe'jwa'j ji'pha!, sa' peekx yattewe'sx yuutxi' wejx thaakwe thegwa'j ji'pha!, naa kxah kxtey yuumeeçxa' Dxus luuçxthu súhwa'j ji'phme! sa' Dxusa's jiimeesate jxthaakwek yuuwesa yuuna.

⁹Nmi' uute' u'yçxáa neeyūusaatxi' pu'çxwa'ja', nawa sesenta anxu ji'phsa teeçx nmi' yakhçxáa fxi'zesatx txā'wē pu'çxwa'ja'. ¹⁰Txāawe'sxa' багаçxtewa ew fxi'zesa yuutxna na'wē yūuna: luuçx ji'phsaçxa' txāatx ew jxpe'jsa yuutxna, yatte pa'jsatx jxpa'gasa yuutxna, yakhtē'jwe'sxtxi peeygāhna pu'çxsa yuutxna, nxuste pxthaa yuusatx pu'çxsa yuutxna, kīhtewa jxuka ewçxáa yūuna fxi'zesaçxáatx pu'çxwa'ja'.

¹¹Nawa sesenta anxu āhmée ji'phsatxi' jxpa'gawa'jme!. Txā'wēme!, ki' imi'wa'jçxá's yaakxnite Kristo tasxu txuteetxna, ¹²aça' txā'wē yūuçxa' yuuwesa yuutxna, txā'wē Kristo yakh fxi'zeya' puutx we'weni's e'skhē nvxiitpa'ga. ¹³Sa' txā'wēsa' yat iisa pa'jna u'jya' piyaatxna, mjīiwal'j yu'sa' yaakxsamée yuuna. Sa' txā'wēçxáamée, txā'wē txāawe'sx we'wewa'jmeesu jxuka we'we pu'çxya' piyaçxa', yuwee ksuusu'jsa yuutxna. ¹⁴Txāa pa'ga nee kna'satey txāawe'sx nmi' uute!, txāawe'sxa' ki' iimi'çxa luuçx uyçxa yatte fxi'zetxna, txā'wē Dxus yakh fxi'zesatx açesa nuywe'wekahnénthu txā'wē jxkaaja'. ¹⁵Txā'wē yūumeeçxa maai' yu' Dxusa's peçxkanaçxa eçxthē'j yakh fxi'zena ūsta'.

¹⁶Dxusna jiisa' nçxi'k ma'k yuu meeçxa' niisa ma'k yuu nawa maawa i'kwe'sx nwe'sx txā'wē u'yçxáa neeyūusa's sājīna jxpe'jwal'j ji'phi'kwe, kxah dxuus yatte pkhaakhesawe'sxa' txakwe thēysa's uymeetxna txāa u'ytxi pu'çxna, naasáa kīh nwe'sx yuhwa ji'phmeesaçxá's pu'çxwa'jsata'.

¹⁷Dxus yuwe's pta'sxna kaapiya'jna nasatx ew jxpe'jsa' wala ew pu'çxni fxi'zewal'j ji'phta'. ¹⁸Txāa pa'gatey Dxus libru' na'wēk pta'sxi': Mjīisa bwey yuwe's tudnu iīū' mjīikahn jī'k, sa' vxite ajkhēwa we'weçxa': Mjīisa' jxpa'gawa'j ji'pha' jī'k.

¹⁹Dxus yuwe's pta'sxsatx yuuwesa' jīna nuywe'weni's e'z meeçxawa tekx ew jiisa kasehmey yu' nwēese'jnu. ²⁰Nawa isa pkalte dxih fxi'zena ūste jiyuçxa', juuna' mwe'we jxukaysa ksxavxyte, kxah vxite wēse'jna ūssa' ūukhçxa pkalte fxi'zemeetxna. ²¹Dxus vxite' kwe'sxtxi jxpe'jsa Jesukristo vxite' Dxus angel txhitxnisa txāawe'sx dxi'pte txā'wē yūuwa'ja's kajaçthu, āhmée yūusatxi' jxukaytxi txāa na'wēçxaçxáa we'wena yu'kxpejkahn. ²²Jiyumey yu' kim yuhnawa dxuus yatte jxkaahwa'jsa ki'pnu. Txā'wē jiyumey jxkaahwa'jsa ki'pçxa', txajx pkala's sūth pu'çxsa yuune'ga. Kīhwa ewmeesa yu's jxuka mpa'yajkx.

²³Nawa tutxh wala aça'g txāa pa'ga yuuçxáa yu'çxá's yu' tudxmée, uwa yu' pusmeesa yu's le'çxkwe mtudx.

²⁴Maai' yu' txāawe'sx pkala' wala āate ya'jjiyu'tx paapējxmeetewa. Nawa vxite' ya'jjiyu'çmeeta!, txā'wēsa' nmeh ente yā'jçxáa ya'jjiyuna. ²⁵Txā'wēytxi ew yūuna fxi'zenisawa āate ya'jjiyu', sa' ew yūuna fxi'zenisa dud yu' āate ya'jjiyumeeçxawa, багаçxtewa vxyaamée yu' neeyūumeetxna.

Dxus yakh fxi'zenisa' naa kiwete ji'phunite thaakwe walasa'

6 ¹Selpiisá' i'kwe'sx patron yakh wala jxpa'yakx nwēese'jna mfxi'zewe, Dxusa's açewe'weni yuukahnén vxite' kwe'sx

kaapiya'jni'swa txã'wëy ewmée we'wekahmén. ²Sa' selpisaawe'sx i'kwe'sx patron maafia' Dxusa's jiisa wáa yuuna açá' txã'wë kwe'sx yakhtêlj iíçxá' sũhçxaçxáa le'çxkwe nwēese'jmée fxi'zewa'j ji'phmeeta', wejxwa jweeíçxáa ew selpiwa'j ji'phta', txãa pa'gatey Dxusna jiasatxíçxáa wejx ew pu'çxna selpiwa'ja' peeygãhna. Txã'wë yũuwa'ja's pta'sxna mkaapiya'j.

³Maafi yu' kwe'sxtxi jxpe'jsa Jesukristo kaapiya'jni'smée, fxiy wáa pta'sxina kwe'sx kaapiya'jni'swamée, ⁴sa' txã' ũuste iwejçx yaakxsa kíhwa jiimeesaçxa txã'wë yuuna. Naasáa txã' luuku na'wë kíhwa seelpimeesuçxáa we'wena fxi'zesa yuuna açá' txã'wë yũupa'gak vxitetx ewmée yũuwa'j kaseje': açeyaakxni, puini, wēesxuni, nasa ewsatx ewmeesata' sũhna fxi'zeni, ⁵puiiwa'j pçuwa'jmeek kaseje', txã'wë nasa Dxusa's jiimeesawe'sx yakh. Sa' ewmée kaapiya'jsawe'sxa' Dxus yakh fxi'zeni jínisa' vxyuu knaynisana sũju'tx. Txã'wësa yakha' pkhaakhenu. ⁶Txã'wë Dxus yakh fxi'zenisa' naa kiwete iiméh wala ji'phunisate jxthaakwe walasa' kíhwa ji'phmeeçxawa wët fxi'zesa yakh yu'. ⁷Txãa pa'gatey kwe'sxa' naa kiwete kíhwa ji'phmeetha'w pa'j na' kíhwa ji'phmée kaseje'nja'w. ⁸Txã'wë kíhwa ji'phmeeçxawa ũ'wa'j vxite' athwa'j ropa txã'wësatx ji'phçxaçxáa weçxana fxi'zewa'j ji'ptha'w. ⁹Nawa txã'wë yaakxsame' maafi yu' wala ji'phu wēeniçxá's yaakxsa' ewmeetetx wete', ewmée yũuwa'jçxá's yaakxpa'ga. Sa' txã'wë yaakxnisa' nasatx ewmeete kaaivxitu'jsaçxá'. ¹⁰Txã'wë vxyuçxá's wejx thaakwe yaakxpa'gafiçxáak kíhtewa jxuka ewmée yũuwa'jçxaçxáa kaseje'. Txãa pa'ga maafi yu' vxyuu ji'phu wēeniçxá's yaakxsa' Dxus yakh fxi'zenijũ txuteeçxa wala nxusteçxáa fxi'zena ũsta' peekí.

Dxus yuuçxá's ũuste peçxkanamée yaakxwa'ja's mji'phu

¹¹Nawa idxa' Dxusna nwēese'jsag naa pa'ga txãa ewmeejũ jxuka txuteeçxa kíhte yuhwa jxpubamée Dxusçxáana yajkxna vxitetx peeygãhna thēysa pa'thewa txãatxi' yajkxmée ũusuh jxuka manvxiht ewmeesa's. ¹²Dxus yakh txutemée fxi'zewa'ja'sçxáa çhãçxha mpa'pçxu, bagaçxte yuhwa pçumée itxi fxi'zewa'ja'sçxáa yajkxna. Txã'wë yuukahníçxáak Dxusa' pa'ya, açá' idxa' jxukaysa dxi'pte Dxus yakhçxáa fxi'ze'nja jínag we'we. ¹³Dxusa' na'wë itxi fxi'zewa'ja's peesu'k kíjkiçxah ũsna txãatx jxuka vxite' Jesukristowa Dxus Nçxi'kthu jína áate pta'sxku Poncio Pilato tasxte txã'wë yuusaawe'sx dxi'pte açxha' idxa's jxkaajaçthu: ¹⁴Adx ma'wë jxkaahni's kxtey nwēese'jene'ga kíhte yuhwa jxpubana yu'pthemée kwe'sxtxi jxpe'jsa Jesukristo kíhpkaçx. ¹⁵Jesukristo kíiwal'j en áhte', Dxusa' Jesukristo's kaavxya'ja'jana, txãa pa'gatey Dxus yuuçxáa kíhtewa jxuka ájawa'jsa txãa yuuçxá', sa' Maa jxkaahsatewa jxthaakwe jxtuhtesa', Maatewa jxthaakwe çhãçxhasa. ¹⁶Txãa yuuçxáa uuwa'jsame', eena' kweethnite kim yuhwa utxaaya' ájanimeete ũssa. Txã'sa' maa piçthêlj yuhwa iuymeetxna sa' áçxpkaçx iuymeeta'. Txakwe

seena' walasa txãa yuuçxá's tuuthe'jni yuuwa'ja', bagaçxte yuhwa pçuwa'jmeesa's.

¹⁷Naa kiwete ji'phsatxi' mwe'we, ji'phuwa'jçxá's pa'pçxuna iiwejçx yajkxna fxi'zekahmén. Txã'wẽme' ji'phuniçxá's yaakxni' wala kxulsata', wejxwa Dxusa'sçxáa yaakitxna, txãa pa'gatey txã' itxisa', kwe'sx kīhçxah peejini'swa peejxmée jxuka ũssa. ¹⁸Ew yūuwa'jçxá's mkaah, kxah txãawe'sx ew yūuniçxá's ji'phsa yuutxna, sa' txãawe'sx ji'phuni's vxitetx jxtxuhdeya'wa piyaatxna. ¹⁹Txã'wẽ yūuçxa' cielute jxpa'gawa'ja's jxaawsa yuuçxa, bagaçxte yuhwa pçumée itxi fxi'zewa'ja's jxpa'gasa yuutxna.

Timoteo jxpa'yajkx fxi'zewa'ja's neewe'weni

²⁰Timoteo, idxna neewe'weni's mpa'yajkx. We'weni kīhwa seelpimeesatxi' wẽse'jnu, sa' Dxus yuwete jxthaakwe jjisatha'w jīna weeçxsatxwa nwẽese'jnu. ²¹Txã'wẽ yūumeçxaíí maafí yu' txã'jīna we'wesa yakh u'jsa' jxpubana ũsta' Dxus yakh fxi'zenijū. Txã'wẽ yūukahmén, Dxusa' idxa's pu'çxhina.